

09-05-2004

FM04/23

**Inuussutissarsiutigalugu aalisartut, inuussutissarsiutigalugu piniartut
inuussutissarsiutigalugulu nunalerinermik ingerlataqartut
aallarteqqinnissamut tapiiffigineqartarnerat pillugu Inatsisartut inatsisissaattut
siunnersuut**

pillugu

Aalisarnermut, Piniarnermut Nunalerinermullu Ataatsimiititaliap

ISUMALIUTISSIISSUTAA

Inatsisissatut sunnersuutip aappassaaneerneqarnerani saqqummiunneqartoq

Inatsisartut ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Aqqalukasik Kanuthsen, Inuit Ataqtigiit, siulittaasoq
Inatsisartunut ilaasortaq Ole Dorph, Siumut, siulittaasup tullia
Inatsisartunut ilaasortaq Isak Davidsen, Siumut
Inatsisartunut ilaasortaq Finn Karlsen, Atassut
Inatsisartunut ilaasortaq Mads Peter Grønvald, Kattusseqatigiit, sinniisussaq

Inuussutissarsiutigalugu aalisartut, inuussutissarsiutigalugu piniartut
inuussutissarsiutigalugulu nunalerinermik ingerlataqartut aallarteqqinnissamut
tapiiffigineqartarnerat pillugu Inatsisartut inatsisissaattut siunnersuut UPA 2004-imi
siullermeerneqareermat Aalisarnermut, Piniarnermut Nunalerinermullu
Ataatsimiititaliap misissuataarpaa.

Tusarniaanermi akissutisiat

Siunnersuutip matuma ataatsimiititaliami suliarineqarneranut atugassatut tusarniaanermi akissutigineqartut nuutinneri ataatsimiititaliap pissarsiarisimavai. Ataatsimiititaliap paasivaa inatsisissatut siunnersuutip suliarineqarneranut atatillugu avataaneersut tallimat Naalackersuisunit tusarniaavigineqarsimasut. Taakkununga tunngatillugu tusarniaavigineqartut pingasut sapaatit akunnerinit sisamanit sivikinneralaarsuarmik akissuteqarnissamut piffissalerneqarsimapput. Tamanna ataatsimiititaliap ajuusaarnartutut isigaa.

Apeqqutit

Ataatsimiititaliap siunnersuummik suliaqarneranut atugassatut Aalisarnermut Piniarnermullu Naalackersuisoq apeqqutinut arlalinnut akissuteqaqqullugu ataatsimiititaliamit qinnuigineqarsimavoq. Ataatsimiititaliap apeqqutaasa Naalackersuisunullu ilaasortap akissutaasa nuutinneri isumaliutissiisummut matumunnga ilanngunneqarput.

Siunnersuutip ilusiligaanera

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu Inatsisartut inatsisissaattut siunnersuummut atatillugu apeqqutit paasinarsisinneqarsimanngitsut pillugit Inatsisartut Inatsisissanik Nalilersuisarfiata allakkiaanik ataatsimiititaliaq pissarsivoq. Allakkiaq isumaliutissiisummut matumunnga ilanngunneqarpoq.

Siunnersuutip imarisai

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinniarnermut tapiiffigineqarsinnaanissaannut inatsisitigut tunngavissaasa pissarsiarineqarnissaat inatsisissatut siunnersuutikkut Naalackersuisut kissaatigaat.

Inuussutissarsiutinik ingerlatsisut taakku pinngortitap pissusii inuttulluunniit atukkat nali-nginnaanngitsut aallavigalugit aningaasanik taarsiissutinik pissarsisinnaanermut inatsimmi tunngavissaatitaasunik eqqutitsisutut Namminersornerullutik Oqartussanit [naliliivigineqarsinnaanerat](#) inatsisip siunertaraa. Aningaasaateqarfik atorlugu tapiissutinik tunniusisinnaajumalluni inatsisikkut tunngavissap

pissarsiarineqarnissaanut taarsiullugu Naalakkersuisut suliaqarnissaq toqqaasimagaat ataatsimiititaliap maluginiarpaa.

Inatsisissatut siunnersuummut ataatsimiititaliap aallarniutitut oqaaseqaatai

Nunatsinni pinngortitaq sakkortuumik periuseqarsinnaasarpoq inuussutissarsiutinillu ingerlatsisut inatsisissatut siunnersuummi pineqartut pinngortitap pissusaanit periartarneranillu atugassaqaartitaapput. Pinngortitap inuussutissarsiutinut tunngaviusumik atugassarititai annaasaqaateqartitsisinnaapput inuussutissarsiormiluunniit atortunik aseruisinnaallutik. Inuussutissarsiutini pingaarnerni inuussutissarsiummik ingerlatsisut ilaasa aningaasaqarnikkut periarsinnaanerit annikitsuararsuummat napparsimanerup, annaasaqarnerup sakkunilluunniit atortut ajoqusernerisa kingunerisinnaavaa inuup inuussutissarsiumminik ingerlatseqqissinnaajunnaarnera, taamaalillunilu inunnik isumaginnikkut ikiorsiivigineqartariaqalerneru.

Inuussutissarsiutinik ingerlatsisut ajutoornermit eqqugaasimasut pisunit siumut naatsorsuutigineqareersinnaasimanngitsunit ajutoornermilluunniit nalaanneqartut tapiissutinik qinnuteqaa

teqarnissamut periarfissinneqaqqullugit Inatsisartut inatsisissaannik taassuminnga Naalakkersuisut suliniuteqalersimammata ataatsimiititaliap pitsaasutut isigaa. Aningaasaqarnikkummi tapersiivigineqarnermikkut inuussutissarsiumminnut taamaalillutik uteqqissinnaalissammata.

Taamaammat Naalakkersuisunit siunnersuut, annaasaqaatimik sillimmasiissutitigut pisortanilluunniit allatigut tapersiivigineqarnikkut matussusiivigineqarsinnaanngitsut matussusiivigineqanngitsulluunniit, inunnut ikorfartuiniarnertut ataatsimiititaliap isigai.

Inatsisissatut siunnersuut pitsaasunik ajunngitsunillu amerlasuunik siunertaqartoq ataatsimiititaliap takusinnaagaluarpaguluunniit aalajangiisuusoq tassavoq, ajornanngikkaangat inuussutissarsiutinik ingerlatsisut namminneq inuunerisaminnut pigisaminnullu sillimmasernissamut nammineerlutik akisussaasuugamik eqqaamasariaqaraat. Aaqqissuussineq sinnassaatitut atorneqarsinnaasusariaqanngilaq. Taamaammat tassunga tunngatillugu inuiaqatigiinni apeqqutip pingaarutillip taassuma erseqqissaatiginissaa erseqqissaqqullugu Naalakkersuisunut ataatsimiititaliap kaammattuutigissavaa.

Aaqqiivigisassap taassuma, sammisap Tusagassiivik sillimmasiisarfillu immaqa suleqatigineqarnerisigut, innuttaasunit paasineqarnissaata anguniarnissaa iluaqutaassaasoq ataatsimiititaliaq naliliivoq.

Inatsisip aqutsivigineqarnissaa

Inatsisissatut siunnersuut assigiinngitsorpassuarnik paasineqarsinnaavoq. Ataatsimiititaliap taakku oqaaseqarfigissanngilai, aalajangersakkalli ataasiakkaat tunngaviusumik taamaallaat isummerfigissallugit.

Qinnuteqaateqartut pineqartoq sillimmasiissuteqanngippat sillimasernissamulluunniit killilimmik periarfissaqarpat ajutoormik il.il. pisoqartillugu tapiissutinik tunineqartariaqarnersoq Naalakkersuisut naliliisinnaassasut inatsisissatut siunnersuummi § 2 periarfissaqartitsivoq.

Maleruagassaq taanna qinnuteqaatinik naliliinermi ilaatinneqassappat siunnersuummi § 2 naa-pertorlugu pisuni qanoq ittuni sillimmasiinissamut periarfissamik atuinissamik piumasaqaateqartoqartarnissaanik nammineq atugassanik maleruagassiorneq aqutsinermi isigalugu Naalakkersuisunut pitsaasuusaaq. Taanna atorlugu aqutsinikkut naliliinermi assigiimmik pinninnissamik aallaaviup isiginiarneqanngitsoorsinnaanera annikillisinneqarsinnaavoq.

Siunnersuutip aqutsinikkut aningaasatigullu kingunerisassai

Inatsisip taassuma aqutsivigineranut aningaasartuutigisassat killeqartussaanerannik naliliineq, taamaammallu taakkua pisorta qarfimmu aningaasaliissutigineqartunit akilerneqarsinnaassa

sut ataatsimiititaliap pitsaalluinnartuusutut isigaa. Inatsit taanna naapertorlugu qinnuteqaatinik suliaqarnermi sulianik suliarinnittarnermut inatsimmut tunngaviusut aammattaaq malinneqartussaammata suliaassap suliarinissaanut inatsisilerinikkut sulisorineqartussat pisariaqartut pissarsiarineqartariaqarput.

Ataatsimiititaliap inassuteqaataa

-

Ataatsimiititaliap isumaqatigiittup siunnersuut isumaqatigaa nuannaarutigalugulu immikkut ikiorsiisarnermut aningaasaateqarfimmu taartaassussamik inatsisiliortoqarnissaanik Naalakkersuisut suliniuteqalersimmata. Inatsisartut inatsisaata tamatigoortumik atorneqarsinnaasuunera inatsisip Naalakkersuisunit aqutsivigineqarnissaanut akornutaanavianngitsoq ataatsimiititaliamit qularutigineqanngilaq. Taamaalilluni inatsit taanna naapertorlugu tapiiffigineqarnissamik qinnuteqaatit assigiimmik suliarineqarsinnaallutillu assigiimmik pinnittussaataitanermut tunngaviit malinneqarsinnaassapput.

Inatsisartut Aalisarnermut, Piniarnermut Nunalerinermullu Ataatsimiititaliaat taama oqaaseqarluni Inuussutissarsiuutigalugu aalisartut, inuussutissarsiuutigalugu piniartut inuussutissarsiuutigalugu nunalerinermik ingerlataqartut aallarteqqinnissamut

tapiiffigineqartarnerat pillugu Inatsisartut inatsisissaattut siunnersuut
aappasaanigassanngortippaa.

Aqqalukasik Kanuthsen,
Inuit Ataqtigiit
siulittaasoq

Ole Dorph
SiumutSiulittaasup tullia

Isak Davidsen
Siumut

Finn Karlsen
Atassut

Mads Peter Grunvold
Kattusseqtigiit